

DOMENIE XII «VIE PAL AN»

Jutoris pe Liturgjie

Ai 21 di Jugn dal 2020

Alore Gjesù ur vierzè la ment par lâ a font des Scrituris (Lc. 24, 45)

Vite - Bibie - Popul

pre Antoni Beline e une sô opinion di îr - par fânus rifleti vuê

Prime de Bibie: necessarie leture de situazion dal nestri popul

Vuê si cjatìn a zuiâ une partide une vore intrigade: se si sierin, o murin scjafaiâts; se si spalanchin, o murin glotûts. E o vin di rivâ, cun fadie e cun coragjo, a cjatâ un cert ecuilibri, che nol pò e nol à mai di jessi definitîf, fra lis esigjencis dal nestri borc e paîs e lis esigjencis dal paîs o borc "globâl", come ch'a disin. Une sfide che a àn scugnût frontâle ducj i popui piçui cuant che si son cjatâts tal zûc dai grancj imperialisims economics, politics e culturâi. Pensin ai imperis de romanitât in ca, al passaç di un mont contadin e di paîs a un mont industrializât e di citât, ai ribaltaments storics e gjeografics *dal secul XX* tant di ca che di là de spaltade di fier, par finî cu la invasion tecnologjiche, massmediatiche, di mode e il costum dal model merican.

No je mai stade facile la vite de furmie. Furtune che e à vût il don di lavorâ saldo cence cjalâsi tant ator, contentantsi di dâ ogni tant cualchi becade a di chei ch'a levin a importunâle o a meti in pericul la pâs ingegnose dal furmiâr. Ma vuê si rivial a lavorâ in pâs? Cui si varessial di becâ se ti plombin di ogni bande? E si puedial fevelâ ancjemò di furmiâr?

Dutis domandis che la nestre gjenerazion si cjate a scugnî frontâlis e a dâur une rispueste il plui pussibil concrete e positive.

Furtunât il popul che al è il Signôr il so Diu - par une leture sapienziâl de Bibie.

* * *

Tal cjapitul 10 dal so vanzeli, Matieu nus conte che Gjesù clamâts dongje di sè i siei dodis dissepui, ur dè il podê di parâ fûr i spirts soçs e di vuarî ogni sorte di malatie e di infermitât. (.....) Chesçj a son i dodis che Gjesù al mandà, dopo di vêur dadis chestis istruzions...

Duncje "al mandà": si trate di une "mission", la mission pal inizi di un mont gnûf no plui sistemât tal tragic dominî de prepotence dal om spotic sore dal om, ma fondât tal spirt dal ream di Diu: te division di un amôr libar e liberant par ducj, fin a cjoli ogni disugualgjance, malatie e puaretât.

Tal discors, lis raccomandazions di Gjesù a son tantis e al sarès ben lei i versets 1-25 dal cjapitul parcè che a son la fonde dal vanzeli de messe di vuê. In particolâr il Mestri al dîs: Parait fûr i spirts soçs e vuarî ogni sorte di malatie... Ve: jo us mandi come pioris framieç dai lôfs... Stait vuardâts dai oms... e in conclusion: Il dissepul nol è plui dal mestri. Se i àn dit Beelzebul al paron di cjase, cetant miôr ai siei di cjase! Come che si viôt, nol è par nuie un cuadri seren e tant mancul golôs.

Par chest il tocût di Vanzeli e la leture dal libri di Gjeremie de messe di vuê nus raccomandandin: No vês di vê pôre dai oms. No une "pôre" par un qualsiasi motîf, ma "pôre" pes consequencis tal meti in pratiche i insegnaments di Gjesù par cambiâ il mût malât dal nestri vivi: une societât che no à nissune passion di modificâsi, di convertîsi e di vuarî.

Antifone di jentrade

Il Signôr al è une fuarce pal so popul,

cf. Sal 27,8-9

pal so consacrât une crete di salvece.
Salve il to popul, Signôr,
benedis la tô ereditât e indrecile par simpri.

Colete

Danus la gracie, Signôr,
di vê pal to non sant un timôr simpri compagnât dal amôr,
parcè che no tu lassis mai cence la tô guide
chei che tu ju âs inlidrisâts su la fonde dal to amôr.
Pal nestri Signôr Gjesù Crist to Fi, ch'al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE

Gjer 20,10-13

Il Signôr al à liberade la vite dal pûar des sgrifis dal trist.

Gjeremie al à profetât tal VII-VI secul p. d. C. e dome Diu sa lis persecuzions che al à patît par presentâ la strade dal Signôr a un popul cjavestri che nol voleve savêdint. Culî o cjatî un toc di diari des sôs zornadis tormentadis, des sôs pôris e di dute la sô fiducie tal Signôr fin a podê dî: laudait il Signôr, ch'al à liberade la vite dal pûar des sgrifis dal trist!

Tes nestrîs riflissions e preieris no stin a smentê i Gjeremias di vuê; probabilmèntri tancj, sparniçâts in dut il mont, persecutâts, tormentâts e ancje copâts.

Dal libri dal profete Gjeremie

Al disè Gjeremie: «O ai sintudis lis cjàcaris di tancj di lôr:
«Terôr dulintor!
Denunciait e lu denunciarin!».
Ducj i miei amîs
a spietin che m'incopedi:
«Salacor si lasse imbroiâ
e cussi o rivarìn a vincilu,
si svindicarìn cuintri di lui!».
Ma il Signôr al è cun me tant che un fuart plen di vigorie,
par chel i miei persecutôrs
a cloparan, e no le varan vinte;
a varan grande vergogne parcè che no ur larà drete:
vergogne eterne, che no si le dismentearà par mai!
Ma tu, Signôr des schiriis,
tu scrutinis cun justizie,
tu viodis i rognons e il cûr.
Jo o gjoldarai dal to svindic cuintri di lôr,
parcè che la mê cause te ai lassade a ti.
Cjantait al Signôr,
laudait il Signôr,
ch'al à liberade la vite dal pûar
des sgrifis dal trist!
Peraule di Diu.

SALM RESPONSORIÂL

dal Salm 68

Cheste preiere e pues dome comovi il nestri cûr e tal tornâle a scoltâ e a preâ metinus in comunion e partecipazion spirituâl cui martars di vuê. Stâur vizins in umanitât; e cun lôr, dongje dal Signôr che ur dei corajo e liberazion.

R. Tal to grant boncûr rispuidimi, o Diu.

Se cjantât: Il cjant dai salms reponsoriâi, p.62

Par colpe tô mi an cjamât di ofesis

e la mê muse e je plene di vergogne.

O soi diventât un forest pai miei fradis,

un strani pai fis di mê mari.

Parcè che la passion pe tô cjase mi à consumât

e lis ofesis di chei che ti svilanin mi son plombadis parsore. **R.**

Ma jo, Signôr, ti fâs la mê preiere;

ch'al puedi jessi chest, o Diu, un timp di grazie.

Scoltimi, Signôr, parcè che la tô misericordie e je tant dolce;

tal to boncûr cence misure dami une des tôs cjaladis. **R.**

Cjalait, puare int, e indalegraitsi,

e vualtris ch'ò cirîs Idu,

che il vuestri cûr al cjapi fuarce.

Parcè che la puare int il Signôr al scolte

e i siei presonîrs nol bute di bande.

Che lu laudin i cî e la tiere,

i mârs e dut ce ch'al nade dentri. **R.**

SECONDE LETURE

Rm 5,12-15

Il don de grazie nol è compagn dal fal.

In chest moment al è ben no jentrâ tai gredeis teologjics di S. Pauli. La sostanza dal discors e je chesta: ducj o viodìn che tal mont a regnin il pecjât e la muart, ma ancje, nus dîs l'Apuestul, ducj in Crist o sin salvâts parcè che cuant che nô o jerin inmò pecjadôrs, Crist, tal timp destinât, al è muart pai triscj. Tant plui cumò duncje, justificâts midiant dal so sanc, o sarin salvâts dal svindic in grazie di lui. (Rm 5, 6. 9). Ce grandis realtâts! Grazie; glorie a ti, Signôr. Amen.

De letare di san Pauli apuestul ai Romans

Fradis, come che midiant di un om sôl il pecjât al è jentrât tal mont e cul pecjât la muart, cussì ancje la muart e je rivade a ducj i oms, parcè che ducj a an pecjât. Di fat fintremai a la leç il pecjât al jere tal mont, ma un pecjât nol ven metût in cont se no je la leç. Epûr la muart e à fat di parone espotiche, di Adam fint a Mosè, ancje sun chei che no vevin pecjât, par chê lôr colegance cu la trasgression di Adam, ch'al è figure di chel ch'al veve di vignî.

Ma il don de grazie nol è compagn dal fal. Di fat se pal fal di un sôl a son muarts in tancj, cetant miei il boncûr di Diu e il regâl dal boncûr di un om sôl, Gjesù Crist, si è stranfât sui tancj.

Peraule di Diu.

CJANT AL VANZELI

cf. Zn 15,26.27

R. Aleluia, aleluia.

Il Spirt di veretât lui mi fasarà di testimoni,
al dîs il Signôr,

e ancje vualtris o podarês fâmi di testimonis.

R. Aleluia.

VANZELI

Mt 10,26-33

No stait a spaventâsi par chei che a puedin copâ il cuarp.

Duncje, Gjesù mandantnus a purificâ une societât malade, nus racomande: No vês di vê pôre e nus da lis motivazions: Nol è nuie di taponât... No stait a spaventâsi... dôs passaris... parfin i cjavêi dal vuestri cjâf... vualtris o valês... A son esemplis par visânus che il Pari dai cûi al sa dut e al viôt dut e, a disevin i vecjos: Al darà il capot daûr dal frêt. Pa la cuâl, l'impuartant al è: se un mi ricognossarà denant dai oms, ancje jo lu ricognossarai denant dal Pari gno. Dut passe, ma chest "ricognossiment" al vâl pe eternitât.

Chest vanzeli nus da la ocasion par domandâsi se e in ce che la nestre pratiche religiôse nus regale alc di patiments, parcè che: Sino in mission, patint persecuzion, o no?

Il vanzeli di vuê al podarès sedi ancje la ocasion par numerâ lis tantis pôris di ogni gjenar che a son dentri di nô peâts, come che o sin, in modei di compartament imponûts e in idui inventâts di ogni gjenar.

Al dîs S. Pauli: Joi, puar mai me! Cui mi liberaraial di chest cuarp destinât a la muart? Che al sedi ringraciât Diu midiant di Gjesù Crist nestri Signôr! (cfr. Rm 7, 24-25). L'imparâ de vite di Crist e je terapie e jutori pe liberazion da ogni gjenar di idui e di pôris.

Dal vanzeli seont Matieu

In chê volte, Gjesù al disè ai siei dissepui: «No vês di vê pôre dai oms. Nol è nuie di taponât che nol vedi di jessi palesât e di platât che nol vedi di jessi savût. Ce che us dîs a vualtris tal scûr, disêtlu inte lûs; ce che o sintîs inte orele, predicjaitlu sui cuvierts. No stait a spaventâsi par chei che a puedin copâ il cuarp, ma che no rivin a copâ l'anime. Vêt pôre pluitost di chel che al à il podê di fâ finî te Gheene tant l'anime che il cuarp. Dôs passaris no si vendino forsit par une palanche? Poben, nancje une di lôr no colarà cence che il Pari vuestri lu vueli.

Parfin i cjavêi dal vuestri cjâf a son stâts contâts ducj. No stait a vê pôre, duncje: vualtris o valês ben plui di une vore di passaris! Pa la cuâl, se un mi ricognossarà denant dai oms, ancje jo lu ricognossarai denant dal Pari gno ch'al è tai cûi. Se invezit mi rinearà denant dai oms, ancje jo lu rinearai denant dal Pari gno ch'al è tai cûi.

Peraule dal Signôr.

Su lis ufiertis

Acete, Signôr, il sacrifici di pacificazion e di laude e fâs che, purificâts di cheste nestre azion, o podin ufrîti un cûr ben disponût e che ti plasi. Par Crist nestri Signôr.

Antifone a la comunion

Sal 144,15

I vôi di ducj viers di te si voltin e a spietin, e tu tu ur dâs di mangjâ su l'ore juste.

O ben: Zn 10, 11. 15

Al dîs il Signôr: Jo o soi il bon pastôr e o rimet la mê vite pes pioris.

Daspò de comunion

Diu, che tu nus âs fats tornâ gnûfs cul Cuarp sant e cul Sanc preziôs di to Fi, danus pal to boncûr di cjatâ une redenzie sigure in ce ch'o fasin dispès e cun devozion. Par Crist nestri Signôr.

Cjants

Libri *Hosanna*, sot il titul *Eucaristie*: messe, benedizion eucaristiche, rîts e cjants; dal n.7 al n.62 comprendût.

* * *

Libertà e coraggio

La libertà e il coraggio si traducono nella testimonianza franca e aperta resa a Gesù. Quelli che sono privi di cultura e di prestigio sociale (come gli apostoli) sono pieni di Spirito Santo e hanno imparato al seguito di Gesù quella libertà che non si fonda sul prestigio e sul potere. Il potere non ha molta fantasia inventrice. Di fronte all'incapacità di trovare una soluzione coerente e ragionevole, esso può sempre ricorrere al silenzio imposto con la repressione.

La parola libera e franca corrode e mette in crisi il potere che è senza ragioni.

(.....) La libertà nei confronti degli uomini si fonda sulla fedeltà a Dio, cioè a quello che è giusto in coscienza. E' il principio dell'obiezione di coscienza, della resistenza e della disobbedienza all'ordine ingiusto.

Il potere può reggersi solo sulla base di uomini che hanno rinunciato alla fedeltà a Dio e alla propria coscienza, che hanno svenduto la loro libertà.

Rinaldo Fabris

* * *

- * *I cjants, salms e cjantadis a vegnin ripuartâts cu la numerazion dal libri: Hosanna, Cjants e preieris dal popul furlan, Ed. Glesie Furlane, 2012.*
- * *Il cjant dai salms resposoriâi, Ed. Glesie Furlane, 2012.*
- * *50 corâi de cristianitât todescje voltâts par furlan, ed. Glesie Furlane, 2016.*
- * *Il libri des riflessions di pre Antoni al è: pre Antoni Beline, Furtunât il popul che al è il Signôr il so Diu - par une leture sapienziâl de Bibie, Edizion "La Patrie dal Friûl", 1991.*
- * *Par domandâ chescj libris scrîvêt a info@glesiefurlane.org*